

(maggio - giugno 2003)

Preseade Patrie,

forsi si vês inacuârts, leint il "Messaggero Veneto", che il 7-di Avrîl o ai dât lis dimissions di furlan, e, leint la mê letare su "la Vita Cattolica" dal 14 jugn, o vês capît ancje parcè. La mosse di Cecot, di fâ aleance cun Illy invece di contrastâlu, mi à lassât scaturît.

Cuant che Illy al è diventât il cjiâf, no dome dal podê triestin, ma ancje di dute la çampe furlane, mi jeri inludût che prin o dopo Cecot al acetàs lis propuestis di Saro, e si candidàs ae Regjon tant che l'anti-Illy, tant che "tertium gaudens" jenfri Tondo e Guerra. Ancje se chest al voleve dî metisi cu la CdL. Par amôr dal Friûl, si podeve ancje fâ il sacrifici di lâ cun Aleance Nazionâl. L'industriâl liberâl Illy, par lâ al podê, no si isal aleât cun Rifondazion Comuniste?

Devi dî ancje che no mi à par nuie plasude la frede, false e ipocrite invenzion fanta-horror dai Visitors, che purpûr al è stât il so romanç di plui sflandorôs sucès, tal popul de çampe e massime sui mopoliscj de cjarte stampade in Friûl; ma ancje su "la Vita Cattolica" e la "Patrie dal Friûl".

Ma chel che mi lasse di stuc al è che la aleance cun Illy e jè basade dome su afinitâts personâls e cjacaris. Che mi risulti, nol esist nissun toc di cjarte firmade dulà che Illy, in gambi de poie, si impegne a cjapâ une detaliade schirie di proviodiments a favôr dal Friûl (vâl a dî, de identitât, sogjetivitât, e autonomie dal Friûl rispjet a Triest). Nuie dal gjenar al è scrit sul so program eletorâl ufiziâl. Il non Friûl, nol comparis mai. A son dome cjacaris gjenerichementri decentralistis, clarementri smicjadis a continuâ la opare di fruçonament dal Friûl che Triest a puarte indevant di cuarante agns in ca..

Cemût fasial cumò Cecot a protestâ che nol à firmât nissune gambiâl in blanc a Illy? A mi mi pâ che i à peade te stale triestine la vacje furlane, cence nancje metisi d'acuardi sul presit. Altri chè firmâ gambiâls!

A fevrâr, li de sede de Lee a Reane, Cecot al a dit che cui che al vinç chestis elezions al determinarà la muse de Regjon pai prossins cuarante agns; parcè che i podês che la gnove leç i da al Governadôr a son enormis. Al à dit, papâl, che il Governadôr al varà tes sôs mans il control totâl de spese regionâl, "fin ai contribûts ae ultime bociofile". E savint chest, i à regalât il puest di governadôr a un supertriestin?

Mi fâs ridi (une vore amâr) che al vedi subit tacât a protestâ pal "centralisin" des primis mossis di Illy. Cumò il siôr sindic di Udin al varà vore di vosâ, pai prossins cinc agns. Al podarà fâ dome chel. E viodarin trop a lunc che i restarà la vôs .

Viodarin ancje se in chescj cinc agns Cecot al rivarà adore a meti in pîts il "partît regionâl" di "tipo catalan". Intant, regionâl in ce sens: dal Friûl o de Friulvignesiejulie? E ce vuelial dî partît "post-autonomist"? L'obietîf di Cecot isal o no di costruî un sogjet politic "Friûl" distint de Vignesiejulie? Isal intenzionât a lotâ par che tal gnûf statût regionâl si meti in discussion dut, comprindût il non de regjon e le sede de sô capitâl? Jo o ai l'impression che Cecot al consideri ormai pierdude la partide dal Friûl, e o aceti tant che inmodificabile le Friulvignesiejulie sot Triest.

E fininle cun chê monade dal model catalan. Storichementri, economicementri, politicamentri, demografichementri lis condizions de Catalugne no puedin in nissune maniere jessi comparadis a chês dal Friûl. Cecot al sarà un bon fisic e un bon romanzîr, ma in siencis umanis mi pâ un diletant.

Si tornarin a sintî tal 2008 (se Diu al vûl), pôc prime des gnovis elezions, par viodi cui che al veve reson: se il Cecot che al fevelave te sede de Lee o chei che al à convinçut i furlans a votâ pal paron triestin. Tal infratant podês sparagnâsi di mandâmi la "Patrie": no ai nissune voie, pai prossins cinc agns, di supâmi lis lamentelis, critichis e protestis dai "furlaniscj" ae Cecotti vie cuntri lis prepotencis triestinocentrichis di Illy. Vêso volude la rogne? cumò grataisale.

Cun Giò.

Raimont di Strassolt

N.B. Us domandi formalmentri, se vês voie di publicâ cheste letare, di rispietâ la scansion dai paragrafs; no come chê altre volte, cul risultât che no si capive nuie. Pluitost faseit di mancul di publicâmile.